



Notkun á tölvubúnaði, tölvupósti, Interneti upplýsingakerfum.

Reglur og leiðbeiningar fyrir notendur og stjórnendur

Inngangur

Tölvubúnaður, tölvupóstur og rafræn samskipti er stór hluti af vinnuumhverfi margar starfsmanna Seyðisfjarðarkaupstaðar. Hér á eftir fara reglur um notkun á tölvubúnaði, tölvupósti, interneti og samskiptabúnaði Seyðisfjarðarkaupstaðar sem ætlað er að setja mörk og leiðbeiningar um notkun. Framangreindur búnaður er ætlaður starfsmönnum við störf í þágu Seyðisfjarðarkaupstaðar og íbúa hans. Samhliða ber að gæta þess að starfsmenn njóti einkalífsréttar á vinnustað.

1. Almenn atriði

1.1. Markmið og gildissvið

Markmið þessara reglna þessara er að upplýsa notendur tölvu hjá Seyðisfjarðarkaupstað um hvernig umgangast skuli hugbúnað, tölvupóst, tölvubúnað, internetið upplýsingakerfi og fleira ásamt því að skýra hvernig eftirliti og ábyrgð er háttað.

Markmið reglna þessara er jafnframt að stuðla að því að jafnvægi ríki milli einkalífsréttar annars vegar og hins vegar hagsmuna Seyðisfjarðarkaupstaðar í að tryggja eðlilegt eftirlit og öryggi með notendum og öðrum sem sæta rafrænni vöktun.

Reglurnar eru hluti af öryggi tölvukerfa Seyðisfjarðarkaupstaðar.

Það er hlutverk hvers notanda að tryggja að tölvubúnaður og tæki séu notuð á eðlilegan hátt í þágu Seyðisfjarðarkaupstaðar svo að öryggi og trúnaðar sé gætt og að viðkvæmar upplýsingar komist ekki í hendur óviðkomandi.

1.2. Skilgreiningar

Í reglum þessum hafa eftirfarandi orð merkingu sem hér greinir:

Notandi er tölvunotandi á tölvuneti Seyðisfjarðarkaupstaðar starfsmaður, nemandi, verktakar og aðrir sem hafa fengið aðgang að tölvubúnaði í eigu og/eða í notkun hjá Seyðisfjarðarkaupstað.

Einkatölvupóstur er tölvupóstur sem notandi hjá Seyðisfjarðarkaupstaðar sendir eða móttækur með vél- eða hugbúnaði bæjarins, og lýtur að einkamálefnum hans en varðar hvorki hagsmuni Seyðisfjarðarkaupstaðar né starfsemi hennar.

Netnotkun merkir notkun notenda á þeim hug- og vélbúnaði sem Seyðisfjarðarkaupstaður lætur honum í té, t.d. til að vafra um netið, til að taka við og senda tölvupóst eða til snarspjalls (msn, Facebook, Svarbox o.fl.).

Netvöktun með netvöktun er bæði átt við óreglubundnar athuganir vegna tilfallandi atvika og viðvarandi eða reglubundið endurtekið eftirlit með netnotkun starfsmanna. Netvöktun er ekki framkvæmd hjá kaupstaðnum á notenda útstöðvum.

Atburðaskráning er aðgerð til að tryggja rekjanleika upplýsinga og vinnsluáðgerða í tölvukerfum (þ.e. með log-skrám).

Rafræn vöktun er vöktun sem er viðvarandi eða endurtekin reglulega og felur í sér eftirlit með einstaklingum sem fram fer með fjarstýrðum eða sjálfvirkum búnaði.

Hugtakið tekur til:



- vöktunar sem felur í sér vinnslu persónuupplýsinga, eða leiðir, á að leiða eða getur leitt til slíkrar vinnslu
- vöktunar sem hvorki felur í sér söfnun myndefnis né annarra persónuupplýsinga Rafræn vöktun fer ekki fram hjá kaupstaðnum á notanda útstöðvum.

2. Notkun

2.1. Meðferð notandanafns og aðgangsorða

Upplýsingakerfi Seyðisfjarðarkaupstaðar eru varin með notandanafni og aðgangsorði. Notanda er úthlutað notandanafni og aðgangsorði og er hann ábyrgur fyrir notkun þeirra. Notanda ber að sjá til þess að aðgangsslyklar og leyniorð að tölvubúnaði komist ekki í hendur óviðkomandi. Leiki grunur á að leyniorð hafi komist í hendur óviðkomandi ber að skipta um það án tafar.

2.2. Meðferð gagna og skjalavistun

Stofnanir kaupstaðarins skulu setja sér reglur um skjalavistun í samræmi við samþykktir, lög og reglugerðir þar um. Notanda ber að fara að þeim reglum og vista skjöl, þar með talinn tölvupóst, samkvæmt þeim. Trúnaðarskjöl skulu vistuð með aðgangsstýringu. Stofnanir kaupstaðarins setja sér skjalavistunarreglur. Notanda ber að gæta að umfangi þeirra gagna sem hann vistar t.d. með að forðast margvistun skjala og eyða eldri útgáfum.

Við starfs- eða námslok er notanda óheimilt að eyða gögnum úr tölvukerfum, öðrum en einkagögnum, nema í samráði við yfirmann sinn. Skal notanda gefinn kostur á að taka afrit af einkatölvupósti. Óheimilt er við starfslok að framsenda tölvupóst úr netfangi viðkomandi notanda.

2.3. Meðferð tölvupósts

Notendur skulu vanda frágang tölvupósts, stafsetningu og málfar. Gæta skal almennrar kurteisi í tölvupósti og hafa í huga að sá sem fær tölvupóstinn getur sent hann áfram. Notendur skulu taka reglulega til í tölvupósthólfi sínu, eyða tölvupósti sem ekki þarf að geyma og færa annað efni í skjalavistunarkerfi stofnunar til varðveislu. Sé starfsmaður fjarverandi um tíma skal gera ráðstafanir til að tölvupóstur liggi ekki óafgreiddur. Starfsmaður skal hafa í huga að samskipti um Netið eru ekki með öllu örugg og oft hentar tölvupóstur ekki fyrir viðkvæm gögn eða trúnaðarupplýsingar, einkum vegna hættu á að óviðkomandi geti komist yfir og lesið tölvupóstinn einhvers staðar á leið hans eða hann glattist. Starfsmaður ber ábyrgð á að eftirfarandi grein birtist í neðanmálstexta tölvupósts: “Sá sem fyrir tilviljun, mistök eða án sérstakrar heimildar tekur við símskeytum, myndum eða öðrum fjarskiptamerkum og táknum eða hlustar á símtöl má ekki skrá neitt slíkt hjá sér eða notfæra sér það á nokkurn hátt. Jafnframt ber honum að tilkynna sendanda að upplýsingar hafi ranglega borist sér. Skylt er að gæta fyllsta trúnaðar í slíkum tilfellum, sbr. 5.mgr.47.gr. fjarskiptalaga nr.81/2003”. Í stað þessa texta má nota : “Reglur um trúnað í tölvupóstsamskiptum: <http://www.sfk.is/trunadur>”



2.4. Uppsetning tölvubúnaðar

Seyðisfjarðarkaupstaður leggur til þann hugbúnað sem settur er í tölvur í eigu bæjarins. Þjónustuaðilar tölvumála sjá um uppsetningu tölvubúnaðar. Öðrum notendum er óheimilt að setja upp hugbúnað á tölvur kaupstaðarins nema í samráði við bæjarstjóra eða þjónustuaðila.

2.5. Heimil einkanot

Tölvunotendum Seyðisfjarðarkaupstaðar er heimilt að nýta tölvubúnað bæjarins til að vafra um netið, taka við og senda tölvupóst. Heimild þessi er bundin því skilyrði að einkanotkun sé stillt í hóf, komi ekki niður á starfi viðkomandi notanda. Seyðisfjarðarkaupstaður áskilur sér rétt til að takmarka miðlægt aðgengi að þjónustum sem falla undir einkanot, s.s. MSN, Facebook o.s.frv.

2.6. Óheimil notkun

Eftirfarandi meðferð tölvubúnaðar, tölvupósts og tölvunets er notendum óheimil, þó er ekki er um tæmandi talningu að ræða:

- Sending dreifibréfa með tölvupósti sem er óviðkomandi starfsemi Seyðisfjarðarkaupstaðar, t.d. keðjubréfa, eða dreifibréfa vegna sölumennsku eða safnana.
- Auðkenning eða vistun tölvupósts sem eingöngu varðar starfsemi Seyðisfjarðarkaupstaðar þannig að ætla megi að um einkapóst starfsmanns sé að ræða.
- Sjálfvirk áframsending tölvupósts úr tölvupóstkerfi Seyðisfjarðarkaupstaðar, t.d. á einkapóstfang starfsmanns utan tölvunets Seyðisfjarðarkaupstaðar, nema slíkt sé gert með leyfi forstöðumanna eða annarra yfirmanna sem umboð hafa til að gefa slíkt leyfi.
- Notkun á tölvubúnaði til að senda og eða vista efni sem er ólöglegt, ósiðlegt, illgjarnt, hrottafengið, ærumeiðandi, hatursfullt, hvetur til ólöglegs athæfis eða gefur tilefni til skaðabótakröfu á hendur Seyðisfjarðarkaupstaða.
- Notkun á tölvubúnaði til að nálgast ósiðlegt efni á netinu, svo sem klám, og / eða skoða eða vista slíkt efni í tölvukerfi Seyðisfjarðarkaupstaðar eða á öðrum miðli.
- Að opna tölvupóst með viðhengi frá óþekktum sendanda eða að opna viðhengi með tölvupósti sem auðkennd eru með endingunum .exe, .vba, .sit eða .zip, nema þeir séu þess fyrirfram fullvissir að slíkt sé óhætt. Ástæða þessa er hætta á vírussmiti o.fl. sem getur skaðað rekstraröryggi tölvukerfis kaupstaðarins.
- Að notfæra sér þekkingu sína og aðstöðu til að tengjast tölvukerfum undir notendaheiti eða leyniorði annarra notanda, fara framhjá aðgangsstýringu eða opna og lesa tölvupóst eða skoða aðrar upplýsingar sem þeim eru óviðkomandi.
- Að nota tölvubúnað kaupstaðarins til að sækja stórar skrár svo sem kvikmyndir og tónlist á Netinu. Undantekning á þessu er ef það er vegna starfsemi kaupstaðarins og skal þá leitast til að gera það utan hefðbundins vinnutíma.
- Að vista einkaljósmyndasöfn, tónlistarsöfn og annarskonar einkamargmiðlunarefni á heimasvæðum og sameignarsvæðum Seyðisfjarðarkaupstaðar.

Þetta gildir bæði um efni tölvupósts og efni viðhengja, sem og aðrar leiðir til vistunar og tölvutækra dreifingar.



2.7. Heimildir stofnana til nánari útfærslu

Einstakar stofnanir Seyðisfjarðarkaupstaðar hafa heimildir til þess að útfæra og þrengja nánar notkunarheimildir tölvubúnaðar innan þess ramma sem heildarreglur Seyðisfjarðarkaupstaðar setja.

3. Eftirlit með notkun

3.1. Atburðaskráning og rekjanleiki

Notkun á tölvukerfum á tölvuneti Seyðisfjarðarkaupstaðar er skráð niður á notandanafn. Upplýsingar um notkun eru notaðar til að tryggja öruggan rekstur og til að hafa eftirlit með því að unnið sé samkvæmt reglum kaupstaðarins. Gögn sem verða til og tengjast atburðaskráningunni eru aðgangsstýrð með sérstökum lykilorðum og einungis aðgengileg þeim sem vegna starfa sinna þurfa að geta rakið atburði. Óheimilt er að gera ráðstafanir til að varðveita upplýsingar um netnotkun starfsmanns eftir starfslok. Að öðru leyti fer um varðveislu eftir 7. gr. laga um persónuvernd og meðferð persónuupplýsinga nr. 77/2000.

3.2. Skoðun einkatölvupósts

Óheimilt er að skoða einkatölvupóst notanda. Til viðmiðunar um það hvort um slíkan póst sé að ræða skal m.a. litið til þess hvort hann sé:

- Auðkenndur sem einkamál í efnislínu (e. subject), eða að öðru leyti þannig að augljóst sé að um einkamálefni er að ræða.
- Vistaður í sérstakri möppu (e. folder) á vinnusvæði notanda í tölvupóstkerfinu sem er auðkennd þannig eða ef af öðru má ráða að um einkamál sé að ræða. Þrátt fyrir ákvæði 1. mgr. er heimilt að skoða einkatölvupóst notanda ef brýna nauðsyn ber til, s.s. vegna tölvuveiru eða sambærilegs tæknilegs atviks. Slíka skoðun má aðeins framkvæma að fyrirmælum bæjarstjóra. Ávallt skal þó fyrst leita eftir samþykki notanda ef þess er kostur. Enda þótt notandi neiti að veita slíkt samþykki skal veita honum færi á að vera viðstaddur skoðunina. Geti notandi ekki verið viðstaddur skoðunina sjálfur skal veita honum færi á að tilnefna annan mann í sinn stað. Ef ekki reynist unnt að gera notanda viðvart um skoðunina fyrirfram skal honum gerð grein fyrir henni strax og hægt er. Notandi á rétt á vitneskju um hver eða hverjir hafa skoðað einkatölvupóst hans.

3.3. Starfstengdur tölvupóstur

Starfs- eða námstengdan tölvupóstur má skoða ef:

1. Nauðsyn ber til vegna lögmætra hagsmuna Seyðisfjarðarkaupstaðar, s.s. til að finna gögn þegar notandi er forfallaður, hefur látið af störfum eða grunur hefur vaknað um misnotkun eða brot í starfi.
2. Nauðsyn ber til vegna tilfallandi atvika, s.s. ef endurbætur, viðhald á tölvukerfum eða eftirlit með þeim leiða óhjákvæmilega til þess að tölvupóstur opnast eða þarf að opna.

Skoðun á tölvupósti skv. 1. mgr. má aðeins framkvæma að fyrirmælum næsta yfirmanns, en ávallt skal kappkostað að leita eftir samþykki viðkomandi notanda og veita honum kost á að vera viðstaddur skoðunina. Geti notandi ekki verið viðstaddur skoðunina sjálfur skal veita honum færi á að tilnefna annan mann í sinn stað. Þetta á þó ekki við ef brýnir hagsmunir mæla gegn því að beðið sé eftir notanda,



s.s. í því tilviki þegar um er að ræða alvarlega bilun í tölvukerfinu, og ekki verði talið að einkalífshagsmunir notandans vegi þyngra. Ríki um það vafi hvort svo sé má ekki skoða tölvupóstinn nema honum hafi fyrst verið veittur kostur á að vera viðstaddur skoðunina. Notandi á rétt á vitneskju um hver eða hverjir hafa skoðað tölvupóst hans.

3.4. Skoðun netnotkunar

Óheimilt er að skoða upplýsingar um netnotkun einstaks notanda nema fyrir liggi rökstuddur grunur um að notandinn hafi brotið gegn gildandi lögum og reglum eða fyrirmælum bæjarstjóra eða yfirmanns. Sé tilefni skoðunar grunur um refsiverðan verknað skal óska atbeina lögreglu.

4. Ábyrgð

4.1. Kynning og birting vinnureglna

Notendum skulu kynntar reglur þessar og tryggja skal að þær séu þeim ávallt aðgengilegar. Kynna skal notendum reglur þessar áður en þeir fá aðgang að tölvukerfum Seyðisfjarðarkaupstaðar. Fræða skal notendur um að upplýsingar um uppflettingar þeirra á netinu varðveitast bæði á netþjóni stofnunarinnar og í vafra í tölvu hvers notanda. Kynna skal þeim aðilum sem veita Seyðisfjarðarkaupstað þjónustu við upplýsingatæknikerfin þessar reglur í trúnaðaryfirlýsingu sem þeir undirrita. Reglur þessar, eins og þær eru hverju sinni, skal birta í heild sinni á heimasíðu Seyðisfjarðarkaupstaðar og varðveita á sameiginlegu drifi Seyðisfjarðarkaupstaðar.

4.2. Eftirlit

Eftirlit með því að reglum þessum sé fylgt er í höndum bæjarstjóra Seyðisfjarðarkaupstaðar, þess sem hann felur slíkt eftirlit sérstaklega og skal vera í samræmi við gildandi lög og reglur hverju sinni. Upplýsingar sem aflað er vegna eftirlits með reglum þessum má eingöngu nota í þágu eftirlitsins með tölvukerfum Seyðisfjarðarkaupstaðar. Þær má ekki afhenda öðrum, vinna frekar eða geyma nema með samþykki starfsmanns. Þó er heimilt að afhenda lögreglu efni með upplýsingum um meintan refsiverðan verknað en þá skal gæta þess að eyða öðrum eintökum nema sérstakir lögvarðir hagsmunir standi til annars. Þá er heimilt að nota gögn til að afmarka, setja fram eða verja réttarkröfu vegna dómsmáls og annarra brýnna hagsmuna, t.d. í tengslum við brottvikningu úr starfi. Sá sem sætt hefur eftirliti skv. 1. mgr. á rétt á að skoða gögn þau sem aflað er um hann í tengslum við eftirlitið. Þegar beiðni um slíkt berst til yfirmanns skal hann svo fljótt sem verða má, og eigi síðar en innan 14 daga verða við beiðninni.

4.3. Starfsmenn við kerfisstjórn og notendaaðstoð

Þjónustuaðilum sem annast rekstur tölvukerfa Seyðisfjarðarkaupstaðar, þ. á m. tölvupóstkerfis og búnaðar til að tengjast Netinu, er með öllu óheimilt að notfæra sér þekkingu sína og aðstoðu til að tengjast tölvukerfunum undir notendaheiti og leyniorði annarra starfsmanna, fara framhjá aðgangsstýringu, opna og lesa tölvupóst sem þeir kunna að komast yfir við rekstur og viðhald tölvukerfisins. Þetta á m.a. við þegar þeir aðstoða einstaka notendur. Hið sama gildir um skoðun hvers kyns upplýsinga sem kunna að varðveitast í tölvukerfi Seyðisfjarðarkaupstaðar um netnotkun starfsmanna og önnur persónuleg gögn þeirra.



5. Brot á reglum

5.1. Meðferð brota

Vakni grunur um að brotið hafi verið gegn reglum þessum skal tilkynna það til næsta yfirmanns, sem tekur ákvörðun um framhald málsins. Ef grunur leikur á um ólöglegt athæfi skal yfirmaður tilkynna það lögreglu að höfðu samráði við bærarstjóra.

1.2. Viðurlög við brotum

Brot gegn þessum reglum geta, eins og önnur brot í starfi, varðað áminningu eða ef um endurtekin eða alvarleg brot er að ræða, brottvikningu úr starfi/námi sbr. starfsmannastefnu og reglur um réttindi og skyldur starfsmanna og stjórnenda Seyðisfjarðarkaupstaðar, ákvæði laga, kjarasamninga og reglugerð um skólareglur í grunnskóla.

2. Gildistaka og tengdar stefnur

Reglur og leiðbeiningar þessar fyrir notendur og stjórnendur, um notkun á tölvubúnaði, tölvupósti, interneti og upplýsingakerfum Seyðisfjarðarkaupstaðar sem bærarstjórn hefur samið og samþykkt taka gildi við staðfestingu bærarstjórnar. Þær eru settar í samræmi við reglur Persónuverndar nr. 837/2006 um rafræna vöktun, sem settar voru samkvæmt heimild í 5. mgr. 37. gr. laga nr. 77/2000, um persónuvernd og meðferð persónuupplýsinga, sbr. 5. gr. laga nr. 81/2002. Yfirfara skal vinnureglur þessar eftir því sem þörf krefur, þó ekki sjaldnar en árlega.

Samþykkt af bærarstjórn 14. júní 2017